



NEWSLETTER

OLIMPIJSKOG KOMITETA BIH



No.15 avgust/septembar 2022



Dragi sportisti i sportski radnici,
Dragi prijatelji,

Olimpijska porodica Bosne i Hercegovine je u ovoj godini obogatila sportske rezultate sa ukupno devet medalja osvojenih na međunarodnim takmičenjima na kojim su najbolji sportisti Bosne i Hercegovine učestvovali u organizaciji OK BiH. Takmičarska godina za OK BiH je zaključena sa ljetnim Evropskim omladinskim olimpijskim festivalom EYOF Banska Bystrica 2022, a već sada su počele pripreme za narednu, 2023. godinu, u kojoj nas očekuju sljedeća takmičenja:

1. Zimski EYOF Friuli Venezia Giulia 2023;
2. Evropske igre Krakow Malopolska 2023;
3. Ljetni EYOF Maribor 2023;
4. Svjetske igre na pijesku Bali 2023;
5. Mediteranske igre na pijesku Heraklion 2023.

Osim učešća na međunarodnim sportskim smotrama u organizaciji OK BiH, naši sportisti i pored zahtjevnih takmičarskih uslova, nastavljaju nizati uspjehe na međunarodnim sportskim takmičenjima, na čemu im iskreno čestitamo!

Olimpijski komitet Bosne i Hercegovine, i pored globalno izazovnih okolnosti, nastavlja podržavati naše najbolje sportiste putem svojih projektnih aktivnosti i dostupnih programa Međunarodnog olimpijskog komiteta i Evropskih olimpijskih komiteta. Od narednih ljetnih Olimpijskih igra dijeli nas nešto više od 20 mjeseci, a trinaest OK BiH stipendista OI Pariz 2024 vrijedno i posvećeno rade na ostvarivanju olimpijskih normi.

U proteklom periodu smo realizovali niz projekata i specijalnih partnerstava. Ponosni smo da je Evropska sedmica sporta obilježena širom zemlje, te da Olimpijski komitet BiH nastavlja projektne aktivnosti u sklopu programa Evropske unije.

Predstavnici OK BiH su učestvovali na 42. EOK Seminaru i MOK Regionalnom forumu u Olimpiji, što je bila izuzetna prilika za spoznaju važnih projektnih informacija, ali i za održavanje niza tematskih sastanaka sa čelnicima MOK-a, EOK-a, ANOK-a i Olimpijske solidarnosti MOK-a. Važno je napomenuti da su članovi Predsjedništva OK BiH učestvovali na sastanku NOK-ova centralne i jugoistočne Evrope koji je održan u Crnoj Gori, u cilju zajedničkog djelovanja i ostvarivanja komplementarnih ciljeva Olimpijskog pokreta.

Predsjedništvo i Izvršni komitet OK BiH nastavljaju djelovati proaktivno u ostvarivanju ciljeva, misije i vizije OK BiH, na opštu dobrobit bh. sporta i sportskog sistema. Još jednom naglašavam da samo ZAJEDNO MOŽEMO BRŽE, VIŠE, JAČE! #StrongerTogether

prof. dr Milanko Mučibabić, predsjednik OK BiH

AKTIVNOSTI PREDSJEDNIŠTVA I IZVRŠNOG KOMITETA OK BiH



U prostorijama Olimpijskog komiteta BiH 14.09.2022. godine, održana je 18. redovna sjednica Predsjedništva i Izvršnog komiteta OK BiH. Na sjednicama su donesene veoma kvalitetne odluke za razvoj sportskog sistema BiH kao i podrška vrhunskim sportistima.

Olimpijski komitet BiH posebno ističe novčanu nagradu za vrhunske rezultate naše plivačice Lane Pudar, koja će joj biti dodjeljena na svečanosti koju će Olimpijski komitet BiH organizovati u narednom periodu.



PREDSJEDNIK OK BiH PROF. DR MILANKO MUČIBABIĆ OSVOJIO ZLATNU MEDALJU NA SVJETSKOM VETERANSKOM JUDO PRVENSTVU

Na Svjetskom prvenstvu za veterane u judo-u koje je održano od 8. do 11.09.2022. u Krakow-u (Poljska) predsjednik OK BiH prof. dr Milanko Mučibabić je osvojio zlatnu medalju za Bosnu i Hercegovinu, što potvrđuje kontinuitet vrhunskih rezultata u ovoj kategoriji Predsjednika OK BiH.

Prof. dr Mučibabić je nosilac majstorskog zvanja 9. DAN u džudou, što je najviše zvanje ovog olimpijskog sporta u Bosni i Hercegovini, ali i šire. Aktivno se bavi džudoom punih 57 godina kao sportista i sportski radnik. Na putu do 9. DAN-a majstorskog zvanja ostvario je izuzetne uspjehe kao takmičar, trener i sportski radnik.

Tokom zlatnog perioda sporta u bivšoj Jugoslaviji, osvojio je evropske i svjetske medalje kao takmičar i trener reprezentacije (1981, 1982, 1986. godine), a najtrofejniji je veteran džudo sporta Bosne i Hercegovine kao višestruki evropski i svjetski veteranski šampion (2010, 2013, 2016, 2017, 2019. i 2022. godine).

Predsjednik prof. dr Mučibabić kao dugogodišnji istaknuti sportista i sportski radnik svojim aktivnostima je primjer mladima da sport nema granica.



15. GODINA OK CRNE GORE I SASTANAK NOK-OVA CENTRALNE I JUGOISTOČNE EVROPE

Predsjedništvo Olimpijskog komiteta Bosne i Hercegovine prisustvovalo je proslavi 15. godišnjice Crnogorskog olimpijskog komiteta. Uz čestitke na dosadašnjem radu i iskrene želje za budućnost, predsjednik OK BiH prof. dr Milanko Mučibabić i potpredsjednici akademik Izet Rađo i gosp. Marijan Kvesić su uručili prigodan poklon Predsjedniku OK Crne Gore gosp. Dušku Simonoviću.



Ovom prilikom je održan i sastanak olimpijskih komiteta centralne i jugoistočne Evrope kojim je predsjedavao Predsjednik EOK-a gosp. Spyros Capralos. Olimpijskim komitetima se obratio i Predsjednik MOK-a dr Thomas Bach putem video linka.

UČEŠĆE OK BIH NA 42. EOC SEMINARU I MOK REGIONALNOM FORUMU



Ovogodišnji domaćin EOK Seminara i MOK Regionalnog foruma je bila Grčka, a događaji su održani simbolično u drevnoj Olimpiji.

Predstavnici Olimpijskog komiteta BiH, predsjednik prof. dr Milanko Mučibabić i generalni sekretar dr sci. Said Fazlagić su učestvovali na 42. Seminaru Evropskih olimpijskih komiteta nakon kojeg je održan i Regionalni forum Međunarodnog olimpijskog komiteta sa fokusom na pripreme olimpijskih komiteta za predstojeće XXXIII Ljetne olimpijske igre Pariz 2024.

EOK Seminar je otvorio predsjednik EOK-a gosp. Spirosom Capralos koji je u svom uvodnom obraćanju poželio dobrodošlicu u drevnoj Olimpiji i to u simboličnom trenutku kada cijela Evropa slavi Evropsku sedmicu sporta.

Prisutne je također pozdravio i Isidoros Kouvelos, predsjednik Međunarodne olimpijske akademije.

Delegate je sa dnevnim redom i aktivnostima EOK kancelarije upoznao generalni sekretar EOK-a Raffaele Pagnozzi.

Seminari i Forumsu organizovanisaciljem da upoznaju Nacionalne olimpijske komitete (NOK) o aktuelnom toku organizacije evropskih i svjetskih takmičenja koja nas očekuju u narednoj godini u organizaciji EOK-a i MOK-a, kao i najveće svjetske sportske smotre, Olimpijskih igara u Parizu, od kojih nas dijeli manje od dvije godine.

Ovo je također bila prilika za spoznaju mnogih važnih projektnih informacija ali i za održavanje niza tematskih sastanaka sa čelnicima MOK-a, EOK-a, ANOK-a i Olimpijske solidarnosti MOK-a. Predsjednik OK BiH prof. dr Milanko Mučibabić je u susretu sa predsjednikom EOK-a gosp. Spirosom Capralos istakao „važnost angažmana sportskih organizacija olimpijskog pokreta, među kojima je i OKBiH, čije djelovanje doprinosi razvoju i unaprijeđenju, ne samo sportskih sistema, već i društva uopšte“.

Prezentirani su izvještaji o napretku narednih projekata nakon čega je upriličena otvorena diskusija na ove teme.

U toku Seminara, razmatran je izvještaj nedavno završenog takmičenja EYOF Banska Bystrica 2022.

Prezentirani su izvještaji komisija EOK-a i to ; EYOF komisije (Liney Haldorsdottir), Marketing komisije (Mihai Covaliu), Komisije sportista (Gerd Kanter), EU komisije kao i izvještaj radne grupe za izradu Strategije razvoja EOK-a 2030 (Đorđe Višacki) i



sportskog direktora EOK-a Petera Brulla.

Razmatran je i izvještaj predsjednika koordinacione komisije EOK-a za Evropske igre Krakow- Malopolska 2023 gosp. Hasana Arata.

Gunilla Lindberg - generalni sekretar ANOK-a prezentirala je izvještaj o izradi



Strategije razvoja ANOK-a. Takođe je prezentirala izvještaj o napretku realizacije projekta ANOC Beach Games - Bali 2022. Nadalje je informisala o bliskoj saradnji sa MOK-om i Međunarodnim sportskim federacijama sa ciljem kreiranja harmoniziranog kalendara takmičenja, od kojih bi najveće benefite imali sportisti.

Zamjenica direktora Olimpijske solidarnosti MOK-a Pamela Vipond informisala je o aktuelnim projektima Olimpijske solidarnosti MOK-a kao i mogućnostima za NOK-ove kroz realizaciju ovih projekata. Napomenula je da su Evropski NOK-ovi za pripreme i učešće na OI Peking 2022 u vidu podrške dobili 10 miliona USD, te su se ove vrste aktivnosti nastavile za Pariz 2024. Pomenuta je i podrška OS ka NOK Ukrajine.

S tim u vezi, pored učešća na višesportskim takmičenjima, OK BiH će korisne informacije i saznanja u budućnosti fokusirati na realizaciju niza projekata Olimpijske solidarnosti MOK-a, a oni su usmjereni ka sportistima, sportskom sistemu i promociji olimpijskih vrijednosti, društveno odgovornim inicijativama i specijalnim partnerstvima u domenu sporta i sportskog djelovanja.

„Na mladima svijet ostaje“. U okviru seminara dodjeljena je i Piotr Nurowski nagrada za najboljeg mladog sportistu Evrope. U uži izbor ušlo je pet sportista. Nagradu je osvojila skakačica u vis Topić Angelina iz Srbije.

Također Predsjednik i Generalni sekretar OK BiH su upriličili sastanke sa prisutnim Predsjednicima i Generalnim sekretarima NOK-ova iz regiona (CG, CRO, SRB, MAK, SLO, KOS, ALB, i sl.) sa namjerom ostvarenja što bolje saradnje, razmjene iskustava i pozitivnih praksi, a u cilju što efikasnijeg rada i zajedničkog djelovanja.

GOSTOVANJE POTPREDSJEDNIKA OK BIH, AKADEMIKA PROF. DR. IZETA RAĐE U EMISIJI TRIBINA 2022

Pogledajte gostovanje Potpredsjednika OK BiH, akademika prof. dr Izeta Rađe na temu finansiranje bh. sporta u emisiji TRIBINA 2022 [OVDJE](#).



DOČEK ZLATNE LANE PUDAR U MOSTARU

Po povratku sa Evropskog prvenstva, u Mostaru organizovan je doček najbolje BH plivačice, naše zlatne Lane Pudar.

Ispred Olimpijskog komiteta BiH, dočeku su prisustvovali Potpredsjednik OK BiH akademik prof. dr Izet Rađo, i generalni sekretar dr. sci Said Fazlagić.

Na dočeku, Olimpijskom komitetu BiH uručeno je priznanje kojim se potvrđuje predanost ove institucije i kontinuirana podrška na Laninom putu ka postizanju vrhunskih rezultata.

Priznanje je u ime OK BiH preuzeo potpredsjednik akademik prof. dr Izet Rađo, kojiseujednoiobratiokupu.



Olimpijski komitet Bosne i Hercegovine će nastaviti podržavati vrhunske sportiste, među njima i Lanu Pudar koja je svojim zlatnim odličjem pokazala svoj vrhunski talenat i potencijal, uz iskrene želje da našu Lanu pratimo i na Olimpijskim igrama u Parizu 2024.

PONOSNI NA TRADICIJU NAŠEG SPONZORA - BH TELECOM PROSLAVIO ROĐENDAN

Olimpijski komitet Bosne i Hercegovine nastavlja dobre priče sa svojim višegodišnjim partnerom BH Telecomom.

Sretan dan BH Telecoma 5. septembar!



OK BIH U POSJETI SPONZORU SPORTSKE ODJEĆE NUMBER 1

Čelnici Olimpijskog komiteta Bosne i Hercegovine su posjetili bosanskohercegovačku renomiranu kompaniju sportske opreme Number1 iz Travnik. Povod posjete je bio razgovor o nastavku saradnje i potpisivanju novog sponzorskog ugovora između OK BiH i kompanije „No1“.

Kompanija No1 je u protekle četiri godine sponzorirala sportsku opremu za BiH timove koji su učestvovali na višesportskim takmičenjima širom svijeta u okviru organizacije Međunarodnog olimpijskog komiteta, Evropskih olimpijskih komiteta i Međunarodnog komiteta mediteranskih igara, te opremila mnogobrojne olimpijce, vrhunske sportiste i sportske radnike.



Predsjednik OK BiH prof.dr Milanko Mučibabić je ovom prilikom izjavio: „Olimpijski komitet BiH je izrazito ponosan da je u proteklom periodu imao veliku sponzorsku podršku domaćih kompanija među kojima je i Number1. Iskreno se nadam da će se ova saradnja na obostrano zadovoljstvo nastaviti i naredne četiri godine. Ovaj vid saradnje konkretno doprinosi razvoju i jačanju sportskog sistema u Bosni i Hercegovini.

U ime svih sportista koji su nosili opremu OK BiH, te promovisali državu Bosnu i Hercegovinu se zahvaljujem, a čelnicima kompanije No1 želim mnogo poslovnih i ličnih uspjeha u narednom periodu“, te dodao: „Olimpijski komitet BiH će posjetiti i kompaniju „Grafobalkan - GB3“ koja je rame uz rame sa “No1“ pratila svako učešće BiH tima i projekte Olimpijskog komiteta BiH u proteklom četverogodišnjem periodu.“

OK BIH U POSJETI SPONZORU SPORTSKE ODJEĆE GB3

Generalni sekretar OK BiH dr. sci Said Fazlagić posjetio je bosanskohercegovačku renomiranu kompaniju sportske opreme GB3 iz Banja Luke. Povod posjete je bio uručenje zahvalnice generalnom direktoru Dušku Skakiću za uspješnu četverogodišnju saradnju, te razgovor o eventualnom nastavku saradnje između OK BiH i kompanije GB3.

Kompanija GB3 je u protekle četiri godine sponzorirala sportsku opremu za BiH timove koji su učestvovali na višesportskim takmičenjima širom svijeta u okviru organizacije Međunarodnog olimpijskog komiteta, Evropskog olimpijskog komiteta i Međunarodnog komiteta mediteranskih igara, te opremila mnogobrojne olimpijce, vrhunske sportiste i sportske radnike.

Generalni sekretar OK BiH dr. sci Fazlagić je ovom prilikom izjavio: „Olimpijskom komitetu Bosne i Hercegovine je bila velika čast i zadovoljstvo da je u proteklom periodu imao veliku sponzorsku podršku domaćih brendova među kojima je i GB3. Promocija BiH brendova konkretno doprinosi razvoju i jačanju sportskog sistema u Bosni i Hercegovini.“

Čelnicima kompanije GB3 želimo mnogo poslovnih i ličnih uspjeha u narednom periodu.

Olimpijski komitet BiH je nedavno posjetio i kompaniju „Number1 iz Travnika“ koja je rame uz rame sa “GB3“ pratila mnoga učešća BiH tima i projekte Olimpijskog komiteta BiH u proteklom četverogodišnjem periodu.

Olimpijski komitet BiH će uskoro vrijeme raspisati javni konkurs za sponzora sportske opreme za naredne četiri godine, a koji će opremiti najbolje bosanskohercegovačke sportiste i timove na međunarodnim višesportskim takmičenjima u organizaciji Olimpijskog komiteta BiH sa ciljem ostvarenja naših i njihovih sportskih snova.



PROJEKTI • OK BIH

MEĐUNARODNI TRIATLON KUP KULIN BAN BORAČKO JEZERO 2022

Boračko jezero, 26.08.2022. – 28.08.2022.

Triatlon asocijacija u BiH uz podršku i specijalno partnerstvo Olimpijskog komiteta BiH i saradnji sa Triatlon i Pentatlon savezom FBiH, u periodu od 26.08.-28.08.2022 godine organizirala je 19. međunarodni Triatlon kup "Kulin ban" Boračko jezero 2022.

U subotu, 27.08.2022 održana je glavna utrka sa do sada najvećim brojem prijavljenih takmičara. Pored domaćih triatlonaca, učestvovali su takmičari iz Hrvatske, Srbije, Crne Gore, Italije, Francuske, Njemačke i Austrije.

U sklopu manifestacije po prvi put održano je takmičenje za djecu do 12 godina u akvatlonu (naizmjenično plivanje i trčanje) I. Kids akvatlon Boračko jezero, na kojem je učestvovalo preko 20 poletaraca. Cilj ove utrke je promocija triatlon sporta i animiranje triatlona kod mlade populacije, stvarajući nove generacije triatlonaca u BiH.



Najbolji triatlonci ovog 19. izdanja Triatlon kupa Kulin Ban u muškoj kategoriji su:

Belmin Godinjak (BiH) sa vremenom 01:11:29, drugo mjesto osvojio je Mustafa Jamak (BiH) s vremenom 01:11:43, a treće mjesto Dragan Jovanović (CG) sa vremenom 01:19:41.

U ženskoj kategoriji najbolje su bile:

Zoe Hamel iz Francuske sa vremenom 01:31:13, drugo mjesto osvojila je Aleksandra Tot (CG) sa vremenom 01:43:51, a treće Amina Šabić (BiH) sa vremenom 01:50:3.

"Zahvaljujemo se Olimpijskom komitetu BiH na saradnji i podršci bez koje ova manifestacija ne bi bila ovako uspješna. Izuzetno smo zahvalni što ste podržali i prepoznali važnost ovog projekta za našu zemlju," izjavili su organizatori ovogodišnjeg Međunarodnog triatlon kupa Kulin Ban.



ITF COACHING HIGH PERFORMANCE PLAYERS (LEVEL 3) PROGRAMME 2022, Robert Raguž

“Kvaliteta programa, sadržaj, organizacija i podrška svih tijela uključenih u ovaj program su znatno premašila moja očekivanja,” izjavio je trener Raguž.

Predavači koji su vodili kurs su Miguel Crespo Ph.D. Head of Participation and Coaching u ITF-u i Rafael Martinez-Gallego Ph.D. i profesor na Univerzitetu Sportskih znanosti u Valenciji. Zajedno su autori mnogobrojnih znanstvenih članaka i knjiga u teniskom svijetu.

Prvi dio kursa je održan online i trajao je 6 tjedana (02.05.2022.-10.06.2022), tokom kojih su pokriveni: teorijski pristup, primjeri i vježbe za sljedećih šest modula: napredna taktika, napredna biomehanika, kondicija, psihologija, planiranje/periodizacija i metodologija. Svaki modul trajao je tjedan dana s praktičnim zadacima i prezentacijama te pismenim ispitom.

Drugi dio kursa je trajao 13 dana (31.07.2022.-13.08.2022.) i održao se u prestižnoj akademiji Pancho Alvarino Academy u Valenciji. U ovom dijelu programa učesnici su imali priliku primijeniti na terenu teorijsko znanje i vježbe koje su prošli u prvoj (online) fazi kursa. Ono što je bitno naglasiti je da su učesnici dobili priliku i slobodu primijeniti to znanje u akademiji sa profesionalnim igračima u stvarnim situacijama, što daje dodatnu vrijednost čitavom programu.

“Ovom prilikom se želim zahvaliti Olimpijskom komitetu Bosne i Hercegovine na prilici da položim ovaj prestižni program pod okriljem ITF-a,” dodao je Robert Raguž nakon uspješno završene edukacije.



PROGRAM MLADIH LIDERA MOK-A OTVARA PRIJAVE

Međunarodni olimpijski komitet (MOK) objavio je da su otvorene prijave za šestu generaciju MOK-ovog programa mladih lidera, koji podržava svjetski olimpijski partner Panasonic. Program ima za cilj podršku mladima u razvoju i implementaciji društvenih projekata koji koriste sport za rješavanje problema u njihovim zajednicama.

Svaka mlada osoba koja želi iskoristiti moć sporta da napravi pozitivnu promjenu u svojoj zajednici može se prijaviti do 20. oktobra 2022. i [registrovati se za obavezno početno četveronedeljno sprint učenje](#) kao prvi korak u procesu prijave. Kada se ovaj korak završi, a na osnovu podnesene projektne ideje, MOK će odabrati 25 mladih lidera koji će imati beneficije od sveobuhvatnog četverogodišnjeg programa, pružajući im finansiranje, mrežnu podršku, alate i ekspertizu kako bi postali uspješni društveni poduzetnici i napravili pozitivan uticaj kroz sport.

[Sve detalje prijave možete pronaći ovdje.](#)

Photo by: [IOC](#)

Program mladih lidera MOK-a dio je dugoročne posvećenosti MOK-a da podrži mlade ljude i osnaži ih da kroz sport postanu kreatori društvenih promjena, dok istovremeno jača ulogu sporta kao pokretača ciljeva održivog razvoja UN-a (SDG). Program je osmišljen tako da na najbolji način osposobi odabrane mlade lidere za rješavanje lokalnih problema kroz lokalne sportske inicijative i održive poslovne modele.



Ovo uključuje obavezno četveronedeljno online sprint učenje, kombinovani pristup učenju sa mjesečnim aktivnostima i događajima uživo, nedeljne module učenja i mogućnosti liderstva, ali i ukupno 10.000 CHF u osnovnom finansiranju koje se daje svakom učesniku tokom četiri godine.

Program mladih lidera MOK-a

Pokrenut 2016. godine, program mladih lidera MOK-a osnažuje mlade ljude da iskoriste moć sporta kako bi napravili pozitivnu razliku u svojim zajednicama. Svaki projekat promovira olimpijske vrijednosti i principe kao što su poštovanje, tolerancija, mir i rodna ravnopravnost, a istovremeno se bavi specifičnim lokalnim problemom. Do sada su mladi lideri MOK-a realizovali 141 projekat vođen sportom, od čega je direktne koristi imalo više od 35.000 ljudi. Program je osnažio 90 mladih lidera iz 66 zemalja. Pored toga, 18 mladih lidera MOK-a služe kao članovi komisije MOK-a, jačajući poziciju mladih ljudi u donošenju odluka o budućnosti sporta.

Kontinuirana podrška svjetskog olimpijskog partnera Panasonic

Program MOK-a za mlade lidere podržava svjetski olimpijski i paraolimpijski partner Panasonic od 2017. godine, a to će se nastaviti do 2024. Panasonic, kao osnivački partner programa, posvećen je podršci mladim liderima MOK-a kroz različite inicijative, na primjer pružanjem kreativne i tehnološke ekspertize, zajedno sa svojom mrežom uticajnih osoba i ambasadora, da inspiriše mlade lidere i omogući im vještine i alate koji su im potrebni da unaprijede svoje projekte.

SPORTSKI STRUKOVNI SAVEZI BIH

JUDO SAVEZ BOSNE I HERCEGOVINE SVJETSKO JUDO PRVENSTVO ZA KADETE I KADETKINJE SARAJEVO 2022

Judo savez Bosne i Hercegovine je bio domaćin Svjetskog prvenstva za kadete i kadetkinje, koje se održalo u dvorani Hills na Ilidži od 24.08. do 28.08.2022

Svečanom otvaranju prisustvovao je predsjednik OK BiH prof.dr Milanko Mučibabić koji je ovom prilikom uručio plaketu za promociju Olimpijskih vrijednosti predsjedniku Međunarodne judo federacije gosp. Marius Vizeru.

Na svečanom otvaranju obratio se predsjednik Međunarodne judo federacije gosp. Marius Vizer, predsjednik EU Judo unije László Tóth, predsjednik Judo saveza BiH i član Izvršnog komiteta OK BiH prof. dr Branislav Crnogorac kao i ministar kulture i sporta KS gosp. Samir Avdić.

Podsjećamo da je na ovom turniru učestvovalo 60 država sa ukupno 484 mlada judaša i judašice, 271 u muškoj i 213 u ženskoj konkurenciji.

Predsjednik Olimpijskog komiteta Bosne i Hercegovine, prof. dr Milanko Mučibabić je u sklopu svečane ceremonije dodjele medalja, uručio odlikovanja najboljim džudistima u kategoriji -81 kg.

Najbolji kadeti svijeta za 2022. godinu u ovoj kategoriji su: Gor Karapetyan (ARM) - zlatna medalja, Alisher Samanov (UZB) - srebrna medalja, te Dušan Grahovac (SRB) i Igor Tsurkan (UKR) bronzane medalje.

Čestitamo Judo savezu BiH na organizaciji Prvenstva.



STONOTENISKI SAVEZ BOSNE I HERCEGOVINE 47. BALKANSKO SENIORSKO EKIPNO I POJEDINAČNO PRVENSTVO

Stonoteniski savez Bosne i Hercegovine je od 23.08. do 27.08.2022. godine bio domaćin 47. Balkanskog seniorskog prvenstva u muškoj i ženskoj konkurenciji, koje se održalo prvi put u BiH.

Ovom organizacijom STS BiH također obilježava i 30. godina postojanja i punopravnog članstva u Evropskoj i Svjetskoj stonoteniskoj uniji (ETTU / ITTF).

Na prvenstvu je učestvovalo 11 reprezentacija i to: Albanija, Bosna i Hercegovina, Bugarska, Crna Gora, Grčka, Kosovo, Italija, S. Makedonija, Rumunija, Srbija i Turska, a svi mečevi su se održali u Olimpijskoj dvorani Ramiz Salčin.



Generalni sekretar OK BiH dr. sci Said Fazlagić učestvovao je na svečanoj ceremoniji otvaranja Balkanskog prvenstva, te je organizatorima poželio uspješnu realizaciju događaja i mnogo sreće i uspjeha svim takmičarima.

SAVEZ DIZAČA TEGOVA BOSNE I HERCEGOVINE POSJETA PREDSJEDNIKA MEĐUNARODNE FEDERACIJE DIZAČA TEGOVA OLIMPIJSKOM KOMITETU BIH (IWF)

U sklopu posjete Savezu dizača tegova BiH, predsjednik Međunarodne federacije dizača tegova (IWF) Mohammed Hasan Jalood boravio je i u Olimpijskom komitetu BiH, gdje su ga primili potpredsjednik OK BiH akademik prof.dr. Izet Rađo i generalni sekretar OK BiH dr.sci. Said Fazlagić.

U posjeti sa g-dinom Jalood-om prisutni su bili i ministar kulture i sporta Kantona Sarajevo, Samir Avdić i predstavnici Saveza dizača tegova BiH, potpredsjednica Enisa Mašić i generalni sekretar Nedim Mašić.

Na sastanku se razgovaralo o razvoju mladih i afirmiranih dizača tegova, razvoju sportske infrastrukture kao i eventualnoj organizaciji nekog od velikih međunarodnih takmičenja iz domena ovog sporta u Bosni i Hercegovini.

U međuvremenu je uspješno održano je i Državno Prvenstvo za U12, U15, U17, U20, U23 i veterani. Nastupili su i na Alpe Adria Kupu u Ljubljani, sa ekipom u kojoj je umjesto jednog seniora, jedne seniorke, jednog juniora i jednog U17, nastupilo dvoje U17 i dvojica juniora.

Održana su dva online meetinga za IWF Coaching, Scientific and Research Committee, na kojoj je ukazana dodatna čast Generalnom sekretaru Nedimu Mašiću, koji će, na Svjetskom prvenstvu u Bogoti, Kolumbija, osim sastanka na kojem će prisustvovati, još i održati predavanje za najbolje Svjetske trenere na temu „Poznavanje tehničkih pravila Olimpijskog dizanja tegova“.

Od ukupno 2 predavanja koje će izvršiti IWF Coaching, Scientific and Research Committee. Nedimu Mašiću je ukazano povjerenje da on održi jedno predavanje, kao najpriznatiji ekspert iz navedene oblasti.



BH • TEAM

PLIVANJE | LANA PUDAR ISTORIJSKI REZULTAT BH. PLIVANJA

Sjajna Lana Pudar je osvojila istorijska odličja za Bosnu i Hercegovinu na Evropskom seniorskom prvenstvu u plivanju u disciplinama 100m i 200m delfin.



Naša olimpijka je u disciplini 100m delfin isplivala vrijeme 57.27 sekundi i osvojila bronzanu medalju, čime se sa samo 16 godina svrstala među najbolje sportistkinje Evrope u plivanju. Ovo je još jedna u nizu medalja za Lanu Pudar, koja je pored odličja ostvarenih u predhodnom periodu osvojila čak pet medalja – dva zlata na Mediteranskim igrama Oran 2022, te dva zlata i jedno srebro na Evropskom juniorskom prvenstvu u Rumuniji.

Nakon bronzne u disciplini 100m delfin nevjerojatna Lana Pudar osvojila je

i zlatnu medalju za Bosnu i Hercegovinu na Evropskom seniorskom prvenstvu u disciplini 200m delfin, uz isplivano vrijeme 02:06.81.

Izuzetan nastup na Evropskom seniorskom prvenstvu ostaće zauvijek upisan u istoriju bh. plivanja.

PREDSJEDNIK OK BIH POSJETIO LANU PUDAR U BANJA LUCI



Predsjednik OK BiH, prof. dr Milanko Mučibabić posjetio je našu najbolju plivačicu i njen tim tokom priprema koje trenutno obavljaju u Banja Luci.

Lana se u Banja Luci priprema za naredne sportske izazove, a prvi međunarodni nastup je planiran na Svjetskom kupu u Berlinu.

Pored Predsjednika OK BiH i Laninog tima – prof. dr Damira Đedovića, trenera i - predsjednika Kluba vodenih sportova Orka i šefa stručnog štaba prof.

dr Gorana Grahovca, posjeti se pridružio i član Izvršnog komiteta OK BiH dr Slobodan Grahovac. Ovom prilikom se razgovaralo o budućim planovima i nastupima Lane Pudar nakon izuzetnih rezultata ostvarenih tokom ljeta. Predsjednik OK BiH prof. dr Milanko Mučibabić poželio je Lani i njenom timu mnogo sreće i sportskih uspjeha u narednom periodu.



BICIKLIZAM | LEJLA NJEMČEVIĆ PRVO MJESTO NA SVJETSKOJ UCI MARATON RANKING LISTI

Nakon posljednjeg upisa bodova najbolja biciklistkinja naše zemlje Lejla Njemčević zauzela je prvo mjesto na Svjetskoj UCI maraton ranking listi i tako ispisala historiju bh. biciklizma.

Lejla je po prvi put u svojoj karijeri na vrhu UCI liste sa 1.508 bodova.

Tokom čitave sezone Lejla je imala sjajne rezultate, tako da trenutno zauzima i prvo mjesto u maraton seriji svjetskih kupova koja ima format Svjetske lige.



Bravo Lejla i čestitamo ti od srca na ovom historijskom uspjehu!

KOŠARKA | EVROPSKO PRVENSTVO 2022 BiH

41. izdanje EuroBasket-a 2022 se održalo u Njemačkoj, Italiji, Češkoj i Gruziji od 01. do 18. septembra 2022. godine

Bosna i Hercegovina se nalazila u grupi B koja je važila za jednu od najtežih grupa i koju su nazvali 'grupom smrti'. Najmanje 4 tima iz ove grupe su imala realna očekivanja da se popnu na podijum u Berlinu.

Selektor Adis Bećiragić na Evropsko prvenstvo je poveo 12 košarkaša, a boje naše selekcije su branili kapiten Miralem Halilović, Jusuf Nurkić, Džanan Musa, John Roberson, Aleksandar Lazić, Amar Gegić, Emir Sulejmanović, Kenan Kamenjaš, Adin Vrabac, Edin Atić, Ajdin Penava i Sani Čampara.



Photo by: [FIBA](#)

Naši košarkaši su u grupi sa Mađarskom, Njemačkom, Slovenijom, Francuskom i Litvanijom ostvarili dvije pobjede i to jednu protiv Slovenije kao aktuelnih prvaka Evrope, no porazom od Litvanije u posljednjem kolu grupne faze završili su nastup na smotri najboljih evropskih selekcija.

Košarkaši Bosne i Hercegovine zauzeli su 18. mjesto na Eurobasketu kao druga najbolja petoplasirana ekipa.

KOŠARKA | SVJETSKO PRVENSTVO ZA KOŠARKAŠICE 2022

Svjetsko prvenstvo za košarkašice održalo se u Australiji od 22.09. do 01.10.2022. godine.

Na debitantskom nastupu na Svjetskom prvenstvu za košarkašice 2022, ženska košarkaška reprezentacija Bosne i Hercegovine je zauzela posljednje mjesto.

Selektor Goran Lojo na Svjetsko prvenstvo je poveo 12 košarkašica koje su branile boje Bosne i Hercegovine, a to su: kapiten Milica Deura, Miljana Džombeta, Nikolina Knežević, Dragana Domuzin, Ajla Ikanović, Nikolina Delić, Ajla Selimović, Nikolina Elez, Jovana Marković, Matea Tavić, Anđela Delić i Jonquel Jones.

U grupi A osim naše selekcije bile su selekcija Portorika, Kine, SAD-a, Belgije i Južne Koreje.



Photo by : [FIBAWWC](https://www.fibawwc.com)

Čestitamo na debitantskom nastupu našoj selekciji i želimo puno sreće u narednim takmičenjima!

ODBOJKA | PLASMAN NA EVROPSKO PRVENSTVO 2023

Reprezentativke Bosne i Hercegovine u odbojci su se plasirale na Evropsko prvenstvo 2023 nakon pobjede u Grčkoj.

Fenomenalna igra i zaslužena pobjeda u Grčkoj, kojom su odbojkašice nastavile pobjednički niz i revanširale se grkinjama za poraz u Sarajevu. Djevojke su opravdale očekivanja navijača i pobijedile favorita grupe rezultatom 3:0 u setovima.



To je dokaz kvalitetnog rada, napornih treninga i borbenosti za nacionalni dres.

Čestitamo našim odbojkašicama, selektoru, članovima stručnog štaba i Odbojkaškom savezu BiH.

ATLETIKA | ABEDIN MUJEZINOVIĆ 16. NA EVROPSKOM ATLETSKOM PRVENSTVU



Naši atletičari Amel Tuka i Abedin Mujezinović nastupili su na Evropskom atletskom prvenstvu koje se održalo u Minhenu. U kvalifikacijskoj utrci na 800 metara, Abedin Mujezinović je uz istrčano vrijeme 1:47.29 i izborio kvalifikacije u polufinale, dok Amel Tuka nažalost nije uspio da se kvalifikuje sa vremenom 1:47.73.

Abedin Mujezinović je polufinalnu utrku na Evropskom prvenstvu u Minhenu istrčao sa vremenom 1:50.20 što je pozicioniralo našeg atletičara na 16. mjesto među najboljim sportistima Evrope u disciplini 800 metara.

TENIS | DAVIS CUP

Teniska reprezentacija Bosne i Hercegovine je pobjedila u dublu protiv Meksika i izborila play-off za ulazak u grupnu fazu Davis Cup-a naredne sezone.

Naša Davis Cup reprezentacija na impresivan način je došla do plasmana u play-off rundu Svjetske grupe. Narednu sezonu Davis Cup-a teniska reprezentacija Bosne i Hercegovine igrat će u elitnim grupama s najjačim selekcijama svijeta, ako pobijede u play-off-u.
Čestitamo !



SAMBO | EVROPSKO SAMBO PRVENSTVO 2022 NOVI SAD

Predstavnici Bosne i Hercegovine Domagoj Jozeljić i Adnan Demirović, članovi Sambo kluba Neretva iz Mostara su na Evropskom sambo prvenstvu u Novom Sadu osvojili dvije bronzane medalje. Navedeni rezultati su prve osvojene evropske medalje u ovom sportu za predstavnike Bosne i Hercegovine.



BOKS | DUNJA VUKSIĆ EVROPSKI VICEŠAMPION U BOKSU ZA KADETE

Mlada bh. bokserka Dunja Vuksić osvojila je drugo mjesto na Evropskom prvenstvu za kadete u boksu, koje se održalo u Turskoj u gradu Erzurum.



U polufinalu je bila bolja od predstavnice Poljske, dok je u finalu poražena od predstavnice Turske.

EU PROJEKTI

EVROPSKA SEDMICA SPORTA 2022

U sklopu realizacije projekta „EU4Youth – European Week of Sport Beyond Borders in the Western Balkans“, kojeg sufinansira Evropska Unija, Olimpijski komitet Bosne i Hercegovine u mjesecu septembru obilježava Evropsku sedmicu sporta kroz organizaciju 3 sportska događaja u Mostaru, Banja Luci i Sarajevu

Evropska sedmica sporta ima za cilj promociju i podizanje svijesti o neophodnosti povećanja bavljenja fizičkom aktivnošću i sportom kod šire publike diljem Bosne i Hercegovine.

Za sport je također važno da stvori okruženje u kojem se svi osjećaju dobrodošli i sigurni da učestvuju. Sport mora nastaviti da jača naše međusobne veze, koristeći ga kao alat za kreiranje budućnosti koju mi želimo.



Prvi događaj „Škola atletike u Mostaru“ održao se na Univerzitetu „Džemal Bijedić“ u Mostaru – Nastavnički fakultet, a organizovane aktivnosti su takmičenja djece na 60m, skok u dalj, prenos loptica, bacanje vortexa, štafetne igrice i zajedničko druženje. Ovaj događaj se održao 24.09.2022. godine (subota).

U nedjelju, 25. septembra, u fiskulturnoj sali sportske dvorane Obilićevo u Banja Luci, Judo klub Borac Banja Luka organizovao je četiri aktivnosti i školu sporta, sportove na tatamiju: judo i karate, sportove sa loptom: košarka i nogomet, te školu sportova sa rekvizitama: trčanje u vrećama, trke sa preponama i između dvije vatre.

Akademija Miske je u Sarajevu 30.09.2022. godine organizovala druženje i aktivnosti sa mladim fudbalerima na terenima Zetra sa početkom u 18 sati. Realizirane aktivnosti vezane su za nogomet, ali i druge zanimljive igre u kojima su prisutni uživali.

Ambasadori Evropske sedmice sporta su naše sjajne vrhunske sportistkinje Lejla Tanović i Lana Pudar, koje aktivno žive sport, njegove vrijednosti i ideale, šireći pozitivan stav i uticaj na širu društvenu zajednicu.



OLIMPIJSKI KOMITET BOSNE I HERCEGOVINE PARTNER NA TRI EU PROJEKTA U 2023. GODINI

Olimpijski komitet Bosne i Hercegovine u 2023. godini je partner na tri Erasmus + sport projekta

OCEAN - Olimpijski komiteti Evrope na putu karbonske neutralnosti

Projekat OCEAN ima za cilj da osnaži Nacionalne olimpijske komitete u sticanju znanja mjerenja karbonskog otiska i definiranja strategije za svaki NOK za potrebe smanjenja karbonske emisije, a sve u cilju dobrog upravljanja u oblasti klimatskih promjena. Projekat koordinira EOC EU OFFICE u Briselu, a među partnerima se nalazi četrnaest NOK-ova Evrope.

Projekat traje 30 mjeseci.

ENGSO - Sport kao vrijednosti

Sport kao vrijednost je projekat izgradnje kapaciteta u oblasti sporta koji će uključiti 9 partnera iz 8 zemalja EU i regiona Balkana. Ova saradnja će imati za cilj izgradnju kapaciteta sportskih klubova, organizacija i saveza da integrišu pozitivne vrijednosti u sportsku praksu na osnovnom nivou na strukturiran, dinamičan i sistematičan način. Projekt koordinator je organizacija ENGSO (European Sports NGO), a među partnerima je sedam NOK-ova iz regiona.

Projekat traje 24 mjeseca.

OlympicKids - Djeca trče ka Olimpijadi

Projektom "Djeca trče ka Olimpijadi" želimo da sa partnerima (Turska, Grčka, Italija, Francuska, Moldavija i Španija) predstavimo Olimpijadu djeci kao alat za sprječavanje od socijalne isključenosti, integrišemo ih u društvenom životu i omogućimo im da budu fizički aktivni. Želimo implementirati projekat „OlympicKids“ kao važnu obrazovnu priliku, posebno za djecu, kako bismo stvorili EU društvo integrirano s olimpijskim vrijednostima, sa principima jednakosti, održivosti, humanosti, univerzalnosti, solidarnosti, sporta, obrazovanja i fair play-a.

Projekat traje 24 mjeseca.



INTERVJU SA... **ANĐELKOM RADIŠKOVIĆ**



Anđelka Radišković - kapiten Ženske odbojkaške reprezentacije Bosne i Hercegovine

OK BiH: *Kada i kako se rodila tvoja ljubav prema odbojci?*

ANĐELKA RADIŠKOVIĆ: Ljubav prema odbojci se javila u srednjoj školi. Moj profesor me „nagovorio“ da pokušam s obzirom da sam prije odbojke trenirala atletiku i već bila u sportskim vodama. Svidjelo mi se i što je najbitnije jako dobro i uspješno sam odrađivala sve što se tražilo od mene i to je bila prekretnica da moje zvanje bude odbojkašica.

OK BiH: *Najljepša i najtužnija uspomena sa reprezentacijom BiH?*

ANĐELKA RADIŠKOVIĆ: Najljepša uspomena je zasigurno plasman na Evropsko prvenstvo po prvi put u istoriji i osvajanje Srebrne lige. Najtužnija je jedna od prije par godina kada nas je jedan set dijelio od plasmana na Evropsko, ali na našu žalost nismo uspjele već tada da ispišemo istoriju.

OK BiH: *Trenutak na koji si posebno ponosna u tvojoj sportskoj karijeri?*

ANĐELKA RADIŠKOVIĆ: Ima ih mnogo, ali izdvojit ću za mene svakako najljepši i najemotivniji, a on je vezan za drugi plasman zaredom na Evropsko prvenstvo koj igramo sljedeće godine. Prvi je istorijski, ali ovaj drugi ima neke druge čari.

OK BiH: Ostvarili ste plasman na dva EuroVolley-a, osvojili CEV Srebrnu ligu i izborili opstanak u CEV Zlatnoj ligi. Kako gledate na ovaj veliki posao koji je urađen u proteklih godinu i po dana i šta ovi uspjesi Vama predstavljaju?

ANĐELKA RADIŠKOVIĆ: Za mene kao sportistu jako puno, želja za uspjehom je uvijek velika.

OK BiH: Šta možemo očekivati od Ženske odbojkaške reprezentacije BiH u budućnosti?



ANĐELKA RADIŠKOVIĆ: Jedna mlada, ambiciozna ekipa, željna dokazivanja. Pokazale smo da umijemo da se nosimo sa svim i svačim, i da imamo inat. Zato od nas treba da se očekuje neočekivano.

OK BiH: Poruka za sve mlade koji se žele baviti odbojkom?

ANĐELKA RADIŠKOVIĆ: Mladost treba iskoristiti na najbolji način. Imajte svoj cilj, zacrtajte ga, vjerujte u njega, a prvenstveno vjerujte u sebe.



ZAVIRITE U DRUŠTVENE MREŽE OK BIH (klikom na sliku)



Pratite nas na društvenim mrežama:
(klikom na ikone)



©2022. Olimpijski komitet Bosne i Hercegovine. Sva prava zadržana.
www.okbih.ba

Specijalnu zahvalnost dugujemo sponzorima i partnerima OK BiH.
Klikom na logo posjetite njihove oficijelne stranice.



Moja priča.

